

INUIT ATAQATIGIIT INATSIARTUNI



UPA2022/062

27.05.2022

Johan Lund Olsen

Namminersorlutik Oqartussat suliffeqarfiutaanni aktieselskabini siulersuisunut siulittaasunik toqqaasarneq pillugu oqallinnissamik siunnersuut.

(Inatsisartunut ilaasortaq Jens Napatoq)

Ingerlatseqatigiiffiit pisortanit ilaannakuusumik tamakkiisumilluunnit aktiaateqarnikkut piginneqataaffigineqartut inuiaqatigiinnut pingaaruteqarluinnarput. Arlallit ingerlatseqatigiiffiupput inuiaqatigiinnut pilersuineramik isumaginnuttuusut, takkulu tamatta pisariaqartippavut. Tamassuma saniatigut ingerlatseqatigiiffiit pisortanit pigineqartut inuutissarsiortut akornanni akuusorujussuupput, suliffeqarfiuppummi inuppassuarnik sulisitsisuusut, aammalu nioqqutissianik pisiortormikkut ingerlatseqatigiiffittullu iliuseqarnermikkut suliffeqarfiit, namminersortut sunniuteqarfigisinnaallugit.

Aamma annertuumik toqqaannangikkaluamik pingaaruteqarput, ingerlatseqatigiiffiimmi pissusilersornerat nunatta karsianut sunniuteqarlussinnaasarput, taamatullu inuiaqatigiittut kissaatigisagut naapertorlugit ineriartornissatsinnut periarfissatsinnullu kalluaasorujussinnaasarlutik. Ukiuni kingulliunerusuni tamanna misillerfigisarsimagatsigu arajutsisimaneqarunangilaq, tassami ingerlatseqatigiiffiit inuiaqatigiinnit pigineqartut tamaasa taagunngikkaluarlugit eqqaaginnarsinnaavarput KNI A/S-imi pisarsimasut ingerlatsinerliornikkullu aningaasatigut ajornartoorfiusarsimasut, taamatullu nunatta karsianut, minnerunngitsumillu aamma pisisartunut pitsaanngitsumik sunniuteqarnerluttarsimasut.

INUIT ATAQATIGIIT INATSIARTUNI



Qujanartumilli taamatut ingerlatsinerliornerit qaqtigoortuupput ukiunimi kingulliunerusuni aamma takusalersimavarput ingerlatseqatigiiffiit inuiaqatigiinnit pigineqartut amerlanersaasa ukiumut naatsorsuutaat ajunngitsumik, tassalu ilorraap tungaanut ajunngitsumik inerineqartarsimasut. Ineriartorneq tamanna tamatta nuannaarutissaraarput, pissusissamisoorporlu taamatut ingerlalersimaneq pillugu ingerlatseqatigiiffinni siulersuisuinut, minnerunngitsumillu sulisorpassuinut aamma qujassuteqassalluta.

Ingerlatseqatigiiffinnik ingerlataqarnitsinni aamma eqqaamasassaraarput, taakua ulluinnarni ingerlatsinerminni inuiaqatigiinnut akisussaaffeqarmata akisussaaffeqartuassallutillu. Taammaattumik ingerlatseqatigiiffiit pisortanit pigineqartut inuutissarsiornitsinni taama pingaaruteqartigisumik inissisimanerat patsisigerpiarlugu ingerlatsinerminni ileqqorisaat allanut tuniluussinnaasarnerat amma eqaamaqqissaartariaqarparput. Taamaammallu ingerlatseqatigiiffiit arlallit CSR-imik – tassaasoq ingerlatseqatigiiffiit inuiaqatigiinnut akisussaaffeqarnerat pissussaaffeqarnerallu – tamatuminnigalu tunngaveqarlutik suleqataanerat, kiisalu siulersuisuni suliffiillu pisorta qarfiini tamatigoornerusumik inuttalersuisarnissaq siunertarlugu pimoorussilluni – aamma Naalakkersuisut tungaannit isigalugu – suliniutiginiarneqartarmat nuannaarutissaraarput. Tassungalu tunngatillugu pingaaruteqarpoq oqatigissallugu tamanna inunnik aalajangersimasunik qujageqqusaarneq piinnarlugu pinngimmat aammalu pissusaanngimmat, pissutaallunili CSR-imik suliaqarneq tamatigoortumillu siulersorneqarnikkut ineriartornermut iliuutsit tamakku siuersaasarmata, taamatullu ingerlatseqatigiiffiit pitsaasumik angusaqartarnerannik aamma tunngaviliisarmata.

Ingerlatseqatigiiffiit Namminersorlutik Oqartussanit pigineqartut taamaammatt siulersorneqarnermikkut innuttaaqatitsinnik piginnaaneqarluartunit aammalu inuiaqatigiinnut tunniusimasunik katiterneqartuartariaqarput. Inuit Ataqatigiit arajutsisimannigilluinnarparput ukiut ingerlanerini nunarput ilinniarluarsimasunik misilittagaqarlualersimasunillu nunaqavissunik ilaqartitertualersimasugut, ta-

INUIT ATAQATIGIIT INATSISARTUNI



mannalu pinngitsoqarata qutsatissaraarput. Ineriartorneq tamanna ingerlaan-naqqunaqaaq, Inuit Ataqatigiinniillu taamaammamat inuusuttortatsinnut kaammattuutiguartarparput: Ilinniaritsi, ilinniaritsi piginnaanngorsartuarlusi – ilissimi nunatta namminiilivikkumaarnissaanut, aammalu nunatta aningaasarsiornikkut kiffanngissuseqarnerulernissaanut – tunngavissiisussaavusi!

Inuit Ataqatigiinniillu aamma nuannaarutigisaqaarput tulluusimaarutigalugulu inuusuttut nunaqqativut – nunaqavissut – ilinniarluarsimasut sulii amerliartuinarmata. Aammalu Namminersorlutik Oqartussat ingerlatseqatigiiffissuini siulersuisuiniittalermata ulluinnarni taakku ingerlatsineranni peqataajualerlutik. Taamaassaarmi nunarput asarput nammineerluta aqullugulu sutigut tamatigut ingerlanneqarnera akisussaaffiginiaarsigulu.

Naleqqap oqallissaarutaa eqqarsaatigalugu oqaatigisassara kingulleq taamaammamat tassaaginnalerpoq: Soorunalumi maani nunatsinni pisortat ingerlatseqatigiiffiisa ingerlanneqarneranni nunaqavissut siulersueqataassapput siulersuisuinilu siulittaasuusassassullutik. Soorunalumi allaanerusinnaanngilaq. Qujanaqisumillu nunaqqativut – inuusuttortavut taamatut siunertaqarlutik qaffasissumik ilinniarnerminnik ingerlatsipput – amerliartuinnavillutik - nunartik asagamikku maanilu nunami iliverneqarumaarnissaq siunertarimmassuk. Nuannaarutaaniarli. Tulluusimaarutigisigulu.

Qujanaq.